AZAAN - E- BILAL AUR SURAJ KA NIKALNA



Abde Mustafa

About Abde Mustafa Official

Abde Mustafa Official, Ek Team Ahle Sunnat Wa Jama'at Se Jiska Maqsad Quraano Sunnat Ki Khidmat, Ilme Deen Ki Isha'at Aur Islaahe Ummat

Website: abdemustafaofficial.blogspot.com

Email: Abdemustafa78692@gmail.com

Mobile no.: +919102520764 (WhatsApp, Telegram)

Follow us on Facebook, Instagram, Twitter and Subscribe our YouTube Channel (Search "Abde Mustafa Official" to find us)

Abde Mustafa Social Media Team





Beshtar Awaam Ki Zubaano Par Ye Waqiya Mash'hoor Hai Ke Ek Martaba Hazrat Bilal Radiallaho Ta'ala Anho Ko Azaan Dene Se Roka Gaya To Suraj Hi Nahin Nikla Kayi Muqarrireen Is Waqiye Ko Kaafi Masala Laga Kar Bayaan Karte Hain Aur Batate Hain Ke Hazrat Bilal Radiallaho Ta'ala Anho Ki Zubaan Mein Luknat Thi (Yaani Aap Sahih Se Bol Nahin Paate The) Aur Isi Wajah Se Aap Azaan Mein "Sheen" Ko "Seen" Padhte The Is Par Yahudiyo Ne Taana Diya Ke Musalmano Ne Aisa Moazzin Rakha Hai Jo Sahih Se "Sheen" Bhi Nahin Keh Paata Jab Sahaba -e- Kiraam Ko Iski Khabar Huyi To Unhone Rasoolullah Se Shikayat Ki Aur Dusra Moazzin Rakhne Ki Darkhwast Ki Huzoor -e- Akram Ne Dusre Shakhs Ko Moazzin Muqarrar Farma Diya Aur Agle Din Jab Us Moazzin Ne Fajar Ki Azaan Di To Suraj Hi Nahin Nikla Aur Subah Nahin Huyi! Jab Subah Nahin Huyi To Sab Pareshan Hone Lage Hazrat Umar Faruque Radiallaho Ta'ala Anho Huzoor 🚟

Ki Bargaah Mein Haazir Huye Aur Arz Karne Lage Ke Ya Rasoolallah Bistar Par Karwat Badal Badal Kar Thak Gaya Hoon Lekin Subah Nahin Ho Rahi Hai! Aakhir Ye Maajra Kya Hai?___ Ye Guftagu Chal Hi Rahi Thi Ke Hazrat Jibrayeel Alaihissalam Tashreef Le Aate Hain Aur Huzoor Se Arz Karte Hain Ke Jab Tak Hazrat Bilal Radiallaho Ta'ala Anho Azaan Nahin Denge Tab Tak Subah Nahin Ho Sakti Aur Hazrat Bilal Ki "Seen" Allah Ta'ala Ke Nazdeek "Sheen" Hai___ Phir Hazrat Bilal Radiallaho Ta'ala Anho Ne Azaan Di To Subah Huyi

IS RIWAYAT KI HAQEEQAT

Ye Riwayat Mauzu Wa Mangadhat Hai Jaisa Ke Allama Abul Ahmad, Muhammad Ali Raza Qadri Ashrafi Hafizahullah Likhte Hain Ke Allama Ibne Kaseer Farmate Hain Ke Is Riwayat Ki Koi Asal Nahin Hai (5443، 139، ص 50، ص 139)

Allama Sakhawi Rahimahullah Allama Jamaluddin Muzi Ke Hawale Se Likhte Hain Ke Ye Riwayat Awaam Ki Zubaano Par To Mash'hoor Hai Lekin Humne Ise Kisi Kitab Mein Nahin Paaya

(القاصد الحسنه، ص120، ر221)

Allama Sakhawi Mazeed Likhte Hain Ke Allama Ibne Kaseer Kehte Hain Ke Is Riwayat Ki Koi Asal Nahin (582، 255، ر582)

Allama Abdul Wahhab Sharani Rahimahullah Ne Bhi Is Riwayat Ke Baare Mein Likha Hai Ke Iski Koi Asal Nahin Hai (915، 117، 117)

Aap Rahimahullah Mazeed Likhte Hain Ke Allama Ibne Kaseer Kehte Hain Ke Iski Koi Asal Nahin

Imam Mulla Ali Qaari Rahimahullah Ne Bhi Is Riwayat Ko Mauzu Qarar Diya Hai

Allama Badruddin Zarkashi Rahimahullah Ne Allama Jamaluddin Muzi Aur Shaykh Burhanuddin Sefaqasi Ka Qaul Naqal Kiya Hai Ke Ye Mash'hoor To Hai Lekin Kitabo Mein Aisa Kuchh Bhi Nahin Hai (208، 207، اللآلي المنثورة في الاحاديث المشهورة، ص207، 208)

Allama Ibne Mubrad Muqaddasi Ne Bhi Allama Jamaluddin Muzi Ke Hawale Se Likha Ke Kitabo Mein Iska Wujood Nahin Hai

Allama Ismayeel Bin Muhammad Ajlooni Ne Mulla Ali Qaari, Imam Suyooti Aur Allama Jamaluddin Muzi Ke Hawale Se Likha Hai Ke Iski Koi Asal Nahin (694)، 203، 100 (1934)

Allama Ajlooni Mazeed Likhte Hain Ke Ibne Kaseer Kehte Hain Ke Is Riwayat Ki Koi Asal Nahin (1518، 411)

Is Riwayat Ko Aur Bhi Kayi Kitabo Mein Tanqeed Ka Nishana Banaya Gaya Hai

> (ديكهي: تمييز الطيب من الخبيث، تذكرة الموضوعات للهندى، الدرر للسيوطى، الفوائد للكرمى، اسنى المطالب وغيره)

Shaarahe Bukhari, Hazrat Allama Mufti Shariful Haque Amjadi Alaihi Rehma Likhte Hain Ke Tamam Muhaddiseen Ka Is Par Ittefaq Hai Ke Ye Riwayat Mauzu Mangadhat Aur Bilkul Jhoot Hai (عناری شارح بخاری، جاری شارح بخاری)

Behrul Uloom, Hazrat Allama Mufti Abdul Mannan Aazmi Rahimahullah Likhte Hain Ke Hazrat Bilal Radiallaho Ta'ala Anho Ko Azaan Se Mazool Karne Ka Zikr Hum Ko Nahin Mila Balki "Ayeni" Mein Hai Ke Hazrat Bilal Radiallaho Ta'ala Anho Safar Aur Hazar Har Do Haal Mein Azaan Diya Karte The (109، من العلوم، من العلوم، من المناوي العلوم)

Fatawa Markaze Tarbiyat -e- Ifta Mein Hai Ke Ye Riwayat Mauzu Wa Mangadhat Hai

(انظر: فناوى مركز تربيت افنا، ج2، ص647)

HAZRAT BILAL KI FASAHAT

Is Waqiye Mein Jo Bayaan Kiya Gaya Hai Ke Hazrat Bilal Radiallaho Ta'ala Anho Ki Zubaan Mein Luknat Thi, Ye Kisi Bhi Tarah Qabil -e-Qabool Nahin Kyunki Humare Paas Kayi Dalail Hain Jisse Hazrat Bilal Radiallaho Ta'ala Ki Fasahat Saabit Hoti Hai___ Chunanche,

Nabiye Kareem Ne Abdullah Bin Zaid Ansari Se Irshad Farmaya Ke Bilal Tumse Zyada Saaf Aur Unchi Awaaz Waala Hai

(انظر: الجامع الترمذي، ص69، ر189 و السنن الكبرى، ج1، ص733، ر783 و و النظر: الجامع الترمذي، ص690، ر1896 و اسد الغابه، ج2، ص672 و كنز العمال، ج7، ص283، اليضاً، ج1، ص798 و مند امام احمد، ج4، ص43، ر1659 و صحيح ابن حبان، ص532، ر1659 و صحيح ابن حبان، ص532، ر1679 و السنن الابن ماجه، ص122، ر706 و صحيح ابن خزيمه، ج1، ر373 و السنن للدارمي، ج1، ص286، ر187 و السنن

Is Riwayat Se Saabit Hota Hai Ke Hazrat Bilal Radiallaho Ta'ala Faseehul Lisaan The Aur Isiliye Huzoor Ne Aapko Azaan Dene Ka Hukm Irshad Farmaya Aur Ye Jo Kaha Jaata Hai Ke Aap Ki Zubaan Mein Luknat Thi, Ye Mahaz Mangadhat Baat Hai

Imam Sakhawi Rahimahullah Likhte Hain Ke Hazrat Bilal Radiallaho Ta'ala Anho Ki Faseehul Lisaani Ko Aksar Ahle Ilm Hazraat Ne Bayaan Kiya Hai (255)

Allama Hafiz Ibne Kaseer Likhte Hain Ke Hazrat Bilal Radiallaho Ta'ala Anho Faseehul Lisaan The (البدايه والنهايه، ن55، ص139)

Allama Saalahi Damishqi Ne Bhi Hazrat Bilal Radiallaho Ta'ala Ki Fasahat Ka Zikr Kiya Hai

(سبل الهدى والرشاد، ج11، ص415)

Allama Ajlooni Ne Bhi Aapki Faseehul Lisaani Ka Zikr Kiya Hai (1518, 411 %).

Mazkoora Dalail Se Ye Baat Bilkul Waazeh Ho Jaati Hai Ke Hazrat Bilal Radiallaho Ta'ala Anho Ki Awaaz Bahut Pyaari Thi____ Agar Aapki Zubaan Mein Luknat Hoti To Nabiye Kareem Aapko Azaan Dene Ka Hukm Irshad Na Farmate___ Ek Hadees Mein Huzoor Ka Irshad -e- Paak Hai Ke Azaan

Miyana Rawi Aur Sahulat Ke Saath Padhne Ka Naam Hai Chunanche Agar Tumhari Azaan Mein Ye Dono Baatein Nahin To Tum Azaan Na Do

Yahan Aap Dekhein Ke Huzoor -e- Akram Khud Irshad Farma Rahe Hain Ke Azaan Dene Waale Ko Kaisa Hona Chahiye Aur Agar Us Mein Ye Baatein Na Ho To Wo Azaan Na De Aur Imam Badruddin Ayeni Farmate Hain Ke Ye Hadees Uske Liye Hai Jiske Lehje Mein Fasahat Na Ho___ Jab Khud Mere Aaqa Ye Hukm De Rahe Hain To Kaise Mumkin Hai Ke Aap Kaise Shakhs Ko Azaan Dene Ka Hukm Dein Jis Ki Zubaan Mein Luknat Ho Lihaza Manna Padega Ke Hazrat Bilal Radiallaho Ta'ala Anho Ki Zubaan Mein Luknat Nahin Thi

SURAJ NA NIKALNE WAALI BAAT PAR KUCHH ISHKALAAT :-

Is Riwayat Mein Jo Bayaan Kiya Gaya Hai Ke Jab Hazrat Bilal Radiallaho Ta'ala Anho Ne Azaan Nahin Di To Suraj Nahin Nikla, Is Par Kuchh Ishkalaat Paida Hote Hain Maslan, (1) Ye Baat Bhi Sach Hai Ke Hazrat Bilal Radiallaho Ta'ala Anho Akele Aise Shakhs Nahin The Jo Huzoor Ke Daur Mein Azaan Diya Karte The Huzoor Alaihissalam Ne Masjid -e- Nabawi Mein Mein Hazrat Bilal Radiallaho Ta'ala Anho Ke Ilawa Hazrat Ibne Umme Maktoob Radiallaho Ta'ala Anho Ko Bhi Azaan Dene Ke Liye Muqarrar Farmaya Tha Aur Ye Nabeena Sahabi The Yahan Ek Baat Qabil -e- Ghaur Hai Ke Agar Allah Ta'ala Aur Uske Rasool Ko Ye Baat Napasand Thi Ke Hazrat Bilal Radiallaho Ta'ala Anho Ke Ilawa Koi Aur Azaan De To Phir Dusre Shakhs Ko Moazzin Muqarrar Karne Ka Kya Matlab Hai?

(2) Azaan Aur Iqamat Mein Kabhi Kabhi Aisa Bhi Hota Tha Ke Hazrat Bilal Radiallaho Ta'ala Anho Azaan Diya Karte Aur Hazrat Ibne Umme Maktoob Iqamat Kaha Karte To Kabhi Iske Bar Aks Hazrat Ibne Umme Maktoob Azaan Diya Karte Aur Hazrat Bilal Iqamat Keh Diya Karte

(مصنف ابن الي شيبه، ج1، ص245- وطبقات ابن سعد، ج2، ص423)

Ab Humein Koi Ye Bataye Ke Jab Hazrat Bilal Azaan Dete The Tab To Theek Magar Jab Hazrat Ibne Umme Maktoob Azaan Dete The To Suraj Kaise Nikal Jaata Tha?

(3) Ghazwa -e- Khaibar Se Wapsi Par Aisa Bhi Hua Ke Raat Ke Waqt Ek Jagah Padaao Daala Gaya Aur Huzoor Ne Hazrat Bilal Ko Hukm Diya Ke Jaagte Rehna Magar Thakawat Ki Wajah Se Hazrat Bilal Radiallaho Ta'ala Anho Ki Bhi Aankh Lag Gayi Hatta Ke Suraj Nikal Aaya Jab Suraj Nikal Aaya To Sabse Pehle Huzoor Ki Aankh Mubarak Khuli Aur Phir Dusre Maqam Par Qaza Ada Ki Gayi

(انظر: صحیح مسلم، ص275، ر1560- و سبل الهدی والرشاد، ج8، ص90-و مسند احمد بن حنبل- و ابو داؤد- و ترمذی- و ابن ماجه- و سنن الكبری-و دلائل النبوة- و ابن ابی شیبه- و طبقات ابن سعد- و مجنع الزوائد)

Ab Ye Samajh Se Pare Hai Ke Us Din Suraj Kaise Nikal Aaya Halanki Hazrat Bilal Radiallaho Ta'ala Anho Ne Us Din Azaan Hi Nahin Di

- (4) Jab Huzoor -e- Akram Ka Wisal Ho Gaya To Hazrat Bilal Radiallaho Ta'ala Anho Azaan Aur Madina Dono Ko Chhod Kar Mulke Shaam Chale Gaye Ab Ye Bhi Koi Bataye Ke Un Dino Mein Suraj Kaise Nikal Aaya?
- (5) Aaj Jab Hazrat Bilal Radiallaho Ta'ala Anho Azaan Nahin Dete To Suraj Kaise Nikal Aata Hai?

Mazkoora Dalail Aur Ishkalaat Ki Raushni Mein Ye Baat Suraj Ki Tarah Raushan Ho Gayi Ke Hazrat Bilal Radiallaho Ta'ala Anho Ki Taraf Mansoob Ye Waqiya Be Asal Aur Mangadhat Hai

Humein Chahiye Ke Aisi Riwayaat Ko Bayaan Na Karein Aur Dusro Ki Bhi Islah Karein____ Maujuda Daur Mein To Tehqeeq Ka Naam Hi Uth'ta Hua Nazar Aa Raha Hai___ Muqarrireen Ne To Ise Mitti Mein Milane Ki Koi Kasar Nahin Chhodi___ Hum Shukr Ada Karte Hain Un Tamam Ulma -e- Ahle Sunnat Ka Jinhone Is Daur Mein Bhi Tehqeeq Ka Daaman Nahin Chhoda Agarche Iski Wajah Se Unhein Kayi Musibato Aur Kayi Logon Ki Mukhalifat Ka Saamna Karna Pada___ Allah Ta'ala Hum Gunahgaro Ke Upar Ghuyoor Ulma -e- Ahle Sunnat Ka Aasman Qaayim Rakhe (Aamin)



Our Other Pamphlets

Bahaar -e- Tehreer (5 Parts)
(Ilmi, Tehqeeqi Aur Islahi Tehreero Ka Majmua)
Hazrate Bilal Ke Islam Laane Ka Waqiya
Gaana Bajana Band Karo
Ghaire Sahaba Mein Radiallaho Ta'ala Anho Ka Istemal
Hazrate Bilal Ka Rang Kaala Nahin Tha
Furooyi Ikhtelafaat Rahmat Hain
Hazrate Owais Qarni Ke Daant
Karbala Se Mutalliq Kuchh Jhoote Waqiyaat
More Pamphlets Coming Soon